






John Carter Brown
Library
Brown University



ISAACI VOSSII

DISSERTATIO

DE VERA

ÆTATE MUNDI.

Quâ ostenditur


Natale Mundi Tempus Annis minimum 1440 vulgarem Æram anticipare.



HAG. ÆCOMITIS

Ex Typographia ADRIANI VLACQ.

M. DC. LIX.



NOBILISSIMO ET AMPLISSIMO VIRO

GODEFREDO SLINGELANDIO

ISAACUS VOSSIUS

S. P.

PROculdubio recordaris GODEFREDE
SLINGELANDI, vir amplissime, non
semel nobis sermones fuisse de diversitate
opinionum circa mundi natalem; cona-
tumque me fuisse persuadere, neque alte-
nimium, neque etiam tam prope esse pe-
tenda temporum principia, atque faciunt
hodierni Iudæi, & quod factum nollem,
plerique seculi nostri Christiani. Quan-
doquidem vero res ea aliquanto fuit pro-
lixior, quam ut familiari colloquio absol-
vi potuerit, ac numerorum indigeret inve-
stigatione; non male me facturum esse exi-
stimavi, si potissima quamobrem sic sentiã
argumenta scripto consignarem, eaque ali-
quanto accuratius in ordinem digesta ocu-
lis & iudicio tuo denuo submitterem. Vi-

deor mihi non infeliciter calculum posuif-
se, idemne etiam tibi videbitur, valde du-
bito; verum ut ut fit, adeo breviter & per-
spicue sensus meos explicui, ut minime
existimem futurum me fastidio. Non ad
multos hic remitto scriptores, præsertim
cum sciam, quam tibi eorū displiceat mos,
qui res etiam vulgo notas ex ignotis & ob-
soletis probant nominibus. Sed neq; tem-
porum hic colligo minutias, cum ridicule
mihi fecisse videantur illi, qui horas & sin-
gula annotarunt momenta, cum de integris
seculis certi nihil adfirmare potuerint. Da-
bitur, ut spero, aliquando otium & hæc
quoq; figillatim explicandi, nunc majora &
præcipua tantum subducam intervalla, è
quorum cognitione de universi temporis
mēsurā certius aliquid in posterum deter-
minare possimus. Sed ad ipsam rem venia-
mus, quæ quo clarius & manifestius expli-
cetur, paulo altius exordiemur.

ISAACI VOSSII

DE

ÆTATE MUNDI DISSERTATIO.

CAPUT I.

*Mundum nec æternum esse, nec vetustiore quam
Moyſes statuerit.*

Mundus vel æternus, vel factus. Æternum nemo sanus dixerit. Deo injuriam faciunt qui de opificio ejus nimium sentiunt magnifice, ac hoc ipsi coæternum esse volunt. Sed & intellectui humano vim inferunt, qui statuunt infinitum dari, quod tamen totum è partibus constet finitis. At vero datur ratio physica evidens, quæ evincit mundum habere principium. Si enim esset æternus, jamdudum perpetuo aquarum & fluminum decursu & attritu montes defecissent, ac plana esset terræ superficies. Idem quoque è scopulis clare colligitur; exesæ quidem sunt eorum radices, stant nihilominus.

)ã(

Quod

Quod si ab æterno fuissent, jam quoque ab æterno mari fuissent obruti. Tempus enim si in infinitum producas, jam quoque infinitus erit terminus rei ab quæ æterno necessario contigit, quum tamen ratio vetet, ut terminus statuatur, ubi nullum sit initium. Licet itaque concedatur, ut vel annis mille Platonice oceanus unam tantum abradat unciam, non tamen efficies ut scopuli ab æterno non fuerint consumti. Certum hinc peti potest argumentum habere quoque scopulos statam ætatem, & si recte calculum ponas, ipsa specuum & antrorum mensura docebit spatium temporis quod iis excavandis oceanus impenderit. Cum vero quæ partium, eadem quoque sit universi natura, sequitur mundum habere principium.

Illud autem aut à Deo, aut à seipso. Qui à seipso mundum factum esse ajunt, horum non tantum absurda est opinio, cum aliquid à se ipso fieri posse contendunt, sed etiam impia, utpote qua tollatur Dei existentia. Stulte enim dicitur Deus esse, si nulla sit ratio quam obrem statuatur. Deus ex solis noscitur operibus. Ipsa illo insita ac naturalis idea quæ in nobis est, quaque Deum comprehendimus, non nisi ex operibus ejus procedit. Qui itaque negat, hoc quod cernimus universum ipsius esse opificium, tollit quoque argumentum
unde

unde Dei existentiam colligere possimus. Statuamus igitur mundum à Deo esse creatum. Verum neque hic una omnium est sententia. Complures enim ad multas annorum myriadas tempus creationis remouent, idque ea credo causa, ut videantur propius accedere ad illos, qui ab æterno hanc machinam fuisse contendunt, ac si finiti & infiniti ulla esset proportio, & non majus foret discrimen inter æternitatem, ac spatium quantumvis enorme, quam sit inter punctum mathematicum & mundum uniuersum. Opinioni suæ patrocinium quærent ex Babyloniorum Ægyptiorumque antiquitatibus. His addunt nonnulli Seras, quos perperam Sinas adpellant, è quorum accuratissima Chronographia Mosaycæ historiæ veritatem evertere, ac immensam orbis antiquitatem adstruere conantur. Nec sane adeo eos fefellit successus, quin & multos & præclaros etiam viros ad partes suas pertraxerint. Quamvis autem odiose dictum possit videri, dicam nihilominus, non defuisse, qui fortius istas antiquitates adseruerint, quam alij Mosem defenderint. Neque hoc eo, quod vel his faveam, aut de aliis inique sentiam; sed quod contra variarum gentium armaturâ munitos, telis insuper non legitimis utentes; ipsi nudi & armis justo brevioribus confisi temere

in arenam descenderint. Prædictas gentes non tantam sibi tribuere antiquitatem, quantam ipsi illis affingunt, nec Mosaicam historiam in tam arcta spatia esse cōstringendam, quam faciunt hujus seculi Judæi & qui eos sequuntur Christiani, operæ fuerit pretium paucis ostendere. Verum priusquam eruditarum gentium excutiamus annales, inquiremus verum mundi natalem, hoc enim reperto, fient omnia plana, ac ex uno omnia fonte fluere videbuntur.

CAPUT II.

Moyſis ſententiam de tempore creationis, ex Græca potius translatione, quam ex Hebraico codice eſſe hauriendam.

CUM itaque ſupra memoratæ opiniones nec veri, nec vero aliquid ſimile contineant, ſuper eſt ut unum ſequamur Moſem, ac ut fidei, ita quoque temporis ex illo petamus principia. Sed & hic novum naſcitur dubium cum diverſis adeo modis ejus ſententia proponatur in Hebræis, Græcis, Samaritanis, & Chaldæis apographis, quoniam potiffimum ſint ſequendi. Videor mihi jam multos tanquam ex tripode audacter affirmantes audire,

audire, nequaquam dubitandum esse quin codex Hebraicus unus omnibus sit præferendus, eiq; soli tanquam normæ veritatis adhærendum, utpote unde cæteræ versiones promanarint. Bene sane si Mosis haberemus autographum. Adeone vero quis inops judicij, ut existimet adfuisse Deum semper Judæis librariis, ac direxisse illorum manus calamumque, nullam autem curam habuisse eorum qui describere novi federis libros, in quibus tanta est lectionum varietas, ut si quis omnes inter se committeret codices, quot verba totidem pene sit inventurus discrepantias? Atqui majoris intererat, ut illi potius quam veteris testamenti libri incorrupti ad nos pervenirent. In Evangeliiis & Apostolicis scriptis hanc varietatem & vident & fatentur, idque salva regula fidei fieri potuisse agnoscunt, cur negant ipsum hoc contigisse in Mosaicis & Prophetarum libris? Quis unquam sanæ mentis Dei spiritum aut punctis aut literis, aut vocabulis alligaverit? Esto tamen, ut hoc factum fuisse aliquis existimet. Verum jam longe nobis sanctior esse debebit Samariticus codex, atque Hebraicus. Servant enim Samaritæ scripturam & characteres, qui jam inde à temporibus Mosis in usu fuere. At vero qui vulgo Hebraicus dicitur codex, ille Chaldaicis literis est

exaratus. Certum quippe est, teste beato Hieronymo, Esdram post captivitatem Babyloniam, Chaldaicas invexisse literas, iisque libros sacros descripsisse, neglectis veteribus Hebraicis, quæ eadem erant, atque nunc sunt Samariticæ. Si itaque revivisceret Moses, ne unum quidē apicem in Judæorū libris adsequeretur, cum literas habeāt à Chaldæis, puncta vero & apices à Massoretis.

Desinant itaque viri boni semetipsos decipere, ac Judæorum fabellis assensum præbere. Quæcunque illi tradunt de perpetua & constanti librorum sacrorum conservatione, meræ sunt imposturæ. Postremis quidem seculis diligentiores fuere in describendis sacris voluminibus, ac efficiendo eo, ut omnia exemplaria conspirare viderentur, sed istam æqualitatem inducere Massoretæ, & qui illos præcessere Judæorum Magistri, cum antea tanta passim in exemplaribus occurreret lectionum varietas, ut ipsi Rabbinifateantur omnia fuisse confusa, vixque aliquid certi è tanta lectionum discrepantia elici potuisse. Quamvis autem non omnino improbandus sit Massoretarū labor in expurgandis. Sacri codicis erroribus, in eo tamen reprehendendi sunt quam maxime, quod suo solum fisci iudicio, dubium adeo & difficile opus aggressi sint neglectis & non consultis
cum

cū aliis versionibus, tum præcipue illa septuaginta interpretum, quam si ad partes suas vocassent, longe felicius veras lectiones à falsis dignoscere potuissent. Cum enim hæc versio omnium sit optima antiquissimaque, quis adeo sit pervicax ut non fateatur senes istos, integriores minusque à se invicem discrepantes esse secutos codices, ac melius percepisse sensus sacros, quam posteri ipsorum Rabbini, quorum tãta fuit inscitia & cæcitas, sive illa ingenita, sive pœnæ loco inflictæ fuerit, ut si unum alterumq; excipias, nunquã nisi casu verum dixisse aut scripsisse videantur. Bene itaque, si quisquam, de scripturis divinis meritus est Ludovicus Capellus in præclaro opere de Critica Sacra, qua non tantum ostendit dissensum Judæorum orientalium ab occidentalibus propter diversitatem lectionum, sed & nævos & lacunas Hebraici textus plurimas ac multiplicem medicinam quæ cum aliunde, tum præcipue ex illa LXX Seniorum translatione parari possit, multis & clarissimis docuit exemplis. Non me fugit quid de hoc libro sentiant & Judæi & qui illis favent, verum his auctor sim ut diligentius legant Capellum, & quidem eo usque, donec discussa ingenii nebula luminis adluefiant, ac agnoscant se in sole cæcutisse.

CAPUT III.

Examinatur ratio temporis quod secundum codicem Hebræum effluxit à Principio creationis, usq; ad Diluviū.

NON est nostri instituti pluribus de his in præsentia contendere, id tantum ostendemus, Græcam translationem, ut innumeris aliis in locis, ita quoque in annorum supputatione longe Hebraicorum voluminum calculo esse anteponendam. Hoc quo manifestius adpareat, examinabimus tempus quod à Creatione usque ad Diluvium colligitur, primum quidem secundum codicem Hebræum, tum vero secundum LXX. senum interpretationem. Judæi itaque sic numerant.

<i>Adam genuit Seth</i> —	130 —	800 —	930
<i>Seth genuit Enos</i> —	105 —	807 —	912
<i>Enos genuit Cainan</i> —	90 —	815 —	905
<i>Cainan genuit Maleleel</i> —	70 —	840 —	910
<i>Maleleel genuit Iared</i> —	65 —	830 —	895
<i>Iared genuit Enoch</i> —	162 —	800 —	962
<i>Enoch genuit Matbusalem</i> —	65 —	300 —	365
<i>Matbusalem genuit Lamech</i> —	187 —	782 —	969
<i>Lamech genuit Noach</i> —	182 —	595 —	777
<i>Sub Noacho annos nato Diluvium</i> —	600 —	—	—

Anno etatis.

Supervixerunt.

Vixerunt.

Quamvis Judæi hodierni, & qui eorum sententiam amplectuntur Christiani, acriter & obstinate admodum codicis Hebraici sinceritatem pertendant, nihilque in eo mutatum esse à tot annorum millibus audacter adfirment, non tamen adeo dispiciendum quid ipsi sentiant, quam quid sentiendum sit, præsertim cum neque rationes neque auctoritates adferant ullas, quibus vel suam adstruant, vel aliorum labefactent sententiam. Ac primum quidem illud non leve argumentum vitiatos esse numeros, quod nulla hic justa sit proportio inter vitæ & pubertatis annos. Atqui tamē Deus ita sanxit naturæ leges, ut ubi longa vita, istic quoque fera esset pubertas. Si quis primorum patriarcharū vitam examinet, inveniet illos quāto diutius vixerint, tanto quoq; tardius liberis operā dedisse, nec genuisse nisi quinta aut quarta demum ætatis parte peracta. Decrescente hominum vita, eadem tamen mansit proportio, breviorque ætas, maturiorem semper sortita est pubertatem. Cum vero Græca versio longe justius & ordini naturæ convenientius unicuique patriarchæ annos tribuat, quibus alius alium produxerit, sintque hæc intervalla juxta illorum calculum valde sibi invicem analoga, nequaquam dubitandum esse existimo, quin integriores fuerint codices, quos interpretes

pretes illi secuti sunt, atque isti quos hodie sequimur.

Idem ex Iosepho facile colligi potest. Is enim cum Hebræum codicem, non LXX. interpretū versionem sit secutus, uti infra docebimus, tamen in annis ante diluvium elapsis, cum illis conspirat; unde liquet, hujus seculo in codicibus Hebraicis aliter scriptum fuisse.

Sed neque in Rabbinorum scriptis desunt testimonia unde id ipsum probari possit. In Beresith Raba & passim alibi tradunt Adamum post cædem Abelis per centum triginta annos non per solvisse conjugis suæ jus conjugij. Ut ut autem id fabulosum videatur, adparet tamen exinde, ut nunc in Græca translatione, ita quoque in Hebraicis libris exaratum fuisse olim, neque enim potuit Cain & Abel simul nasci, & eodem quo nati sunt anno alter ab altero occidi.

CAPUT IV.

Proponitur & confirmatur Græcus LXX. interpretum calculus de spatio quod Diluvium præcessit.

Videamus nunc ecquid sit in Græcâ supputatione quod merito reprehendi possit, in ea anni ab Adamo ad Noachum sic colliguntur.

Adam genuit Seth —	230 —	700 —	930
Seth genuit Enos —	205 —	707 —	912
Enos genuit Cainan —	190 —	715 —	905
Cainan genuit Maleleel —	170 —	740 —	910
Maleleel genuit Jared —	165 —	730 —	895
Jared genuit Enoch —	162 —	800 —	962
Enoch genuit Mathusalem —	165 —	200 —	365
Mathusalem genuit Lamechum —	187 —	782 —	969
Lamech genuit Noachum —	188 —	565 —	753
Anno Noachi Diluvium —	600 —	—	—

Anno etatis.

Supervixerunt.

Vixerunt.

Sic anni & tempora singulorum concipiuntur in melioribus libris: sic etiam habet ille omnium antiquissimus codex, quem Alexandrinum vocant:

(ē 2)

cant : sic præterea olim in suis exemplaribus reperit Africanus, cum annos 2262. à rerum principio ad diluvium numerat. Eusebius vitiosam secutus scripturam nativitatem Lamechi refert ad annum Mathusalæ 165. unde sequeretur ipsum quindecim annis superfuisset diluvio. Eusebium secuti Hieronymus, Augustinus, alij. Hinc stultissima olim orta quæstio, ubi Mathusalem fuerit durante diluvio. Sed vero calculum Africani & Alexandrini codicis, confirmant codex Hebraicus & Iosephus, secundum quos ad annum Mathusalæ 187 refertur nativitas Lamechi.

Error tamen hic videtur in Noachi tempore natali. Nempe is natus non 188 anno Lamechi, sed vero 182. Sic Hebræus & Samaritanus codices, sic quoque Iosephus. Itaque non dubito, quin ita etiam prius fuerit in versione septuaginta interpretum.

De tempore mortis Lamechi, quænam scriptura sit præferenda, nō liquet; Nihil hoc facit ad præsens institutum. Sive hanc, sive illam sequaris lectionem, eadem manet annorum summa.

Si itaque prædictos sex annos de tota auferas summa, habebis verum diluvij tempus, annum nempe mundi 2256.

Proxime itaque ad veritatem accessit Africanus,

nus, longius aliquanto abscefferunt Eusebius, & qui eum sunt secuti, à quorum calculo quatuordecim deficiūt anni. In Hebraicis vero codicibus tota sex secula defunt. Omnium vero corruptissima est Samaritarum supputatio, utpotè qui 1307 tantum annos ad diluvium numerent.

Unus Iosephus, ex iis qui exstant, intervallum hoc recte taxavit, illum enim quem dixi numerum expressit. χρόνος δὲ ἐστὶ ἀπὸ Ἀδάμ τῆς πρώτης γεγονότος ἐτῶν ὑπῆρχε διὰ χιλίων διακοσίων πενήκοντα ἕξ. Judæi aut Græci Judaistæ, qui passim annos & tempora in hoc auctore reformarunt, & hunc quoque locum corrumpere conati sunt, rescribendo χιλίων ἑξακοσίων πενήκοντα ἕξ. Sed miseri non animadverterunt, hoc pacto, totam Iosephi supputationem corruere. Siquis enim singulorum patriarcharum, quæ memorat spatia, componat, is illum, quem diximus, habebit annorum numerum. Præterea cum discretim scribat, se quinque millium annorum conscripsisse historiam, absurdum esset existimare, illum ita computasse annos, atque hodierni faciunt Judæi.

Insignis vero est illorum supinitas, qui ut Judæis patrocinentur, ex Iosepho adstruere conantur, Adamum etiamnum superfuisset tempore Lamechi. Nusquam hoc Iosephus temerè id adsum-

tum

tum à Gelenio, quod cuique Græcos codices qua vulgatos, qua manu exaratos consulenti, manifestum fiet. Judæorum est fabella, Lamechum de uxoribus conquestum esse apud Adamum, illum his iussisse, ut ad maritum reverterentur ac sui facerent copiam. Istas respondisse Adamo, ut ipse prius suæ satisfaceret conjugi, à qua jam per centum & triginta annos propter scelus Caini esset separatus. Verum quis adeo sit hebes, ut non videat narratiunculam hanc esse ineptissimam? Ex ea sequeretur Lamechum, qui à Setho septimus fuit, diu fuisse antequam Sethus nasceretur. Sane adeo portentosæ sunt Rabbiorum fabellæ, ut ne ægrorum quidem somniis ulla ex parte cedere videantur.

CAPUT V.

Proponitur & rejicitur numerus annorum, qui ex Hebraicis codicibus colligitur, à diluvio usque ad Abrahæ nativitatem.

ATque hæc de annis & tempore antediluvium elapso secundum hypothesin Mosis, quæ sola vera est, cum cæterarum gentium annales hic vel deficient, vel absurda contineant, breviter nobis dicta

dicta sufficiant. Pergamus nunc ad sequentia secula, & examinemus ætates patriarcharum, qui post diluvium floruerunt. Quod si sufficere cuiquam videantur rationes nostræ in ampliando annorum ante Noachum numero, huic certe multo magis sufficere videbuntur, ea, quæ nunc sumus dicturi de intervallo, quod est à diluvio usque ad Abrahami nativitatem. Nusquam à se invicem longius abeunt sacri codices; cum enim vulgo à Judæis huic spatio tribuantur anni 292. Samaritani adjiciunt sex secula & dimidium fere, Græci vero octo ferme secula. Quamvis autem difficile videatur discrepantes adeo sententias componere, odiosum vero decernere quænam ex iis potissimum sit amplectenda, præsertim cum opinio illa de Hebraici Codicis sinceritate ita omnium animos præoccupaverit, ut pro impiis habeantur, quotquot ab eo vel minimum audent recedere; tanta tamen apud me non est cujusquam mortaliū auctoritas, ut huic rationis & intellectus arbitrium absq; ratione cōcesserim, nec multorū licet vel monita vel minæ terrent me, quominus etiam publice quæ sentiam profitear, quin potius si quo veritatis tenentur studio, efficiā ut ipsi errorē suum agnoscunt, & si ve argumentis si ve testium numero sit pugnandum, vincā illos argumentis, vincam testimoniis.

moniis. Sed adscribamus & consideremus calculum Judaicum quem solum pro vero habendum esse censent.

<i>Ex Sem natus Arphaxat anno post Diluvium</i>	— 2	<i>Sem</i>	—	600
<i>Arphaxat genuit Sala natus annos</i>	— 35	<i>Arphaxat</i>	—	438
<i>Sala genuit Heber natus annos</i>	— 30	<i>Sala</i>	—	433
<i>Heber genuit Phaleg</i>	— 34	<i>Heber</i>	—	464
<i>Phaleg genuit Rehu</i>	— 30	<i>Phaleg</i>	—	239
<i>Rehu genuit Serug</i>	— 32	<i>Rehu</i>	—	239
<i>Serug genuit Nachor</i>	— 30	<i>Serug</i>	—	230
<i>Nachor genuit Thare</i>	— 29	<i>Nachor</i>	—	148
<i>Thare genuit Abraham</i>	— 70	<i>Thare</i>	—	205

Quod supra monuimus, id ipsum quoque hic observare est, pro ratione ætatis, nimis hic brevem statui pueritiam, cum longam vitam necessario longa præcedat pueritia. Tempus pubertatis ut plurimum tertia aut quarta pars est, vitæ humanæ, raro quinta, rarissime sexta. Si Arphaxat, Sala & Eber tam mature genuissent, utique decimæ quintæ generationi interfuissent: imo & vicesimam potuissent videre, cum constet contrarietiora paulatim facta esse generationum spatia. Absurdum autem fuerit credere, aliquem unquam diu adeo interfuisse posteritati suæ.

Mirum quoque si prædicti & subsequentes patriarchæ anno tricesimo & jam ante gignere cœperint,

perint, cum tamen Jsaaci patriarchæ seculo, quo vita hominum altero tanto erat brevior, quadragessimus annus pro juvenili ætate fuerit habitus.

Illud vero non tantum ab omni verisimilitudine remotum, sed & absurdum prorsus, quod juxta hanc supputationem Noachus vixisset usque ad annum Abrahami quinquagesimum octavum. Semus vero supervixisset Abrahamo totis triginta quatuor annis. Atqui Abrahamus à Noacho fuit undecimus. Semus vero duodecimum vel etiam decimum tertium cognovisset hæredem; diu siquidem juxta Hebraicum calculum cum Jacobo & Esavo vixit. Adeone quis infelici sit judicij, ut hæc contigisse existimet? Jam diu ante Abrahamum varia toto orbe regna erant fundata, jam dynastiæ aliquot in Ægypto esse desierant, quæ ab auctoribus sigillatim memorantur, nemo tamen Noachi meminit. Sane si istis temporibus inter vivos etiamnum exstitisset ille universi generis humani auctor & princeps, pleni essent gentium annales de hoc miraculo. Sed nec ipse hoc prætermisisset Moses.

Jam vero quis credat turris Babylonice constructionem, confusionem linguarum, ac dispersionem gentium factam esse vix uno post diluvium elapso seculo? Ex sacris literis manifeste

)i(

hoc

hoc tempus colligitur, inde enim nomen inditum Phalego. Atqui tum forsan necdum tertius Noachonatus erat hæres. Huic difficultati ut nonnulli occurrerent, miram commenti sunt methodum ad multiplicandum brevi spatio genus humanum : primos namque post diluvium patriarchas tam foecundos fuisse dicunt, ut anno ætatis duodecimo, vel etiam prius, liberis gignendis operam dederint. Sed sane etiam si concedatur eos cucurbitarum instar pullulasse, non tamen efficiant, ut hæc computandi ratio non sit prorsus ridicula.

Istud vero non absurdum tantum sed & stultū, & quod fieri minime potuit, octavo & quinquagesimo post diluvium anno apud Assyrios regnasse Ninum & Semiramidē. Quotquot Judaicū sequuntur codicem hoc tempus illis adsignant. Sed si id verum est, quid sentiendum de Belo, & aliis Chaldæorum & Arabum regibus, qui quadringentis & quadraginta annis ante Ninum imperium tenuere? Quid fiet de variis Ægyptiorum dynastiis, quas certum est, aliquot seculis Abrahamo esse vetustiores? Quid denique statuendum de Seribus, qui vulgo Sinenses appellantur; quorum accuratissimam chronographiam si sequamur, jam diluvium septem vel octo seculis anticipabit calculum.

culum Mosaicum. De singulis inferius nonnihil dicemus. Unum hoc nunc addimus ; si tempora subducamus juxta receptam Hebraici codicis scripturam, non gentium tantum historiis, sed & ipsis sacris literis meram inferri noctem.

CAPUT VI.

Proponitur & confirmatur LXX Interpretum de eodem spatio calculus.

AT vero si non hodiernis, sed potius antiquis illis credamus Judæis, septuaginta nempe interpretibus, qui longe integriora secuti sunt ex-
in an̄s̄ia, jam omnia plana fient, ac nulla prorsus noscatur, subjiciā difficultas. Ut hoc clarius cog-
nem Lxx. interpretum colligūtur & juxta versio-
ad Abrahami nativitatem.

<i>Sem genuit Arphaxat anno post Diluvium</i>	— 2
<i>Arphaxat genuit Cainan anno ætatis</i>	— 135
<i>Cainan genuit Sala anno ætatis</i>	— 130
<i>Sala genuit Eber anno ætatis</i>	— 130
<i>Eber genuit Phaleg anno ætatis</i>	— 134
<i>Phaleg genuit Ragau anno ætatis</i>	— 130
<i>Ragau genuit Serug anno ætatis</i>	— 132
<i>Serug genuit Nachor anno ætatis</i>	— 130
<i>Nachor genuit Thara anno ætatis</i>	— 79
<i>Thara genuit anno ætatis.</i>	— 79

) 12 (

Nc.

Neminem, qui hæc leget, futurum puto, qui non mox fateatur, intervalla & spatia quæ cujusque nativitatem intercedunt, longe æquabilius & naturæ convenientius hic signari, atque in superiori Judaico calculo. Ut enim vitæ, sic quoque illi anni, quibus quisque natus est, sensim & iusta ratione decrescunt.

In Cainane vero expungendo prorsus absurdi sunt viri eruditi, plus tribuentes Judæis librariis, quam Evangelicæ veritati. Improbe sentiunt, cum dicunt septuaginta seniores, viros sanctos, propria libidine Cainanem istum addidisse; multo vero improbius, cum Evangelistam horum fraude seductum errasse affirmant. Quibus fortius culpam istam imputemur, præsertim ubi lemne est talia sibi invicem vicina occurrunt; quam fidis interpretibus, quos ut tanti criminis reos peragamus, nulla prorsus vel ratio vel prætextus potest comminisci. Nam quod dicunt casu aut incogitantia ista de Cainane esse adjecta, id ab omni ratione plane est alienum. Si dixissent incogitantia librariorum hæc in Hebræis codicibus esse omissa, non male sensissent: Hæc vero de Cainane verba ejus sunt naturæ, ut neque casu, nec incuria accrescere potuerint. Pravitate vero ali-

aliqua esse inserta, non liquet. Fidendum itaque exemplaribus, & credendum auctoritati B. Lucæ, ac totius veteris Ecclesiæ consensui. Cainanem istum agnovit quoque Berofus, cum Abrahamum decimum esse scribit eorum, qui post diluvium nati sunt, uti est apud Iosephum lib. 1. cap. vii.

Minime quoque audiendi sunt, qui septuagesimo Tharæ anno Abrahamum natum fuisse contendunt. Rectius illi qui in annum patris 130 natalem ejus conjiciunt, ac primogenitum fuisse negant, sed dignitatis ergo primo nominari statuunt, quod in quoque in Noachi liberis congruit, non enim Sem, sed Japhet maximus natus erat. Argumenta quæ pro vulgari opinione afferunt Scaliger & Petavius frigida sunt, nec confutatione digna. Obscura & intellectu difficilia ex iis quæ manifesta sunt lucem debent mutuare; clara vero & manifesta Sacrarum literarum loca non sunt obscurorum locorum tenebris involvenda. Effluxere itaque à diluvio usque ad natalem Abrahami anni 1132.

CAPUT VII.

Ex Samaritico codice idem adstruitur.

PERGamus nunc ad alia, ac confirmemus præcedentis calculi veritatem. Primo quidem se offert codex Samariticus, cujus nobis veneranda debet esse auctoritas. Is igitur in annis, qui à diluvio ad Abrahamum effluxere, plane cum Græca translatione convenit, nisi quod Cainanem expungat, ac Arphaxatum quinquennio juniorem faciat, quando Cainanem. Verum & hic quoque manifeste librariorum adparet error, phaxato enim tribuitur, quod Cainani tribui debuerat. Non Arphaxat centum triginta erat annorum cum liberos gignere inciperet, sed Cainan. Hinc clare colligitur, vel expunctum, vel Hebraici codicis auctoritate prætermisum fuisse Cainanem, ac pro annis quibus Arphaxat genuit Cainanem, suppositos fuisse illos Cainanis, ac sic duos patriarchas in unum coaluisse.

CAPUT VIII.

Idem probatur ex Flavio Iosepho, cujus tota temporum ratio ostenditur.

Succedat Iosephus, & quid ille de hoc ipso intervallo senserit videamus. Is itaque lib. i. cap. vi. Antiquitatum scribit, Abrahamum natum esse anno post diluvium ducentesimo nonagesimo secundo. Deinceps singulorum rationes subducens spatium hoc extendit ad annos nongentos octoginta tres. Prior numerus convenit cum Hebraicis calculis, sequens vero, nisi quod in quibusdam discrepet, haud longe abest ab LXX. interpretum supputatione. Gravissima multis visa est hæc quæstio, & adeo quidem, ut qui ex hac sese difficultate expedire potuerit, hætenus invenirem neminem. Qui Hebraico favent codici, sic existimant; Iosephum conscripsisse historiam quinquies mille annorum, tantum quippe spatium à creatione usque ad suam ætatem definiri putant in præfatione operis, ac præterea in scripto contra Appionem. Id vero tempus sic distribuunt, ut dicant, tria fere annorum millia expirasse à creatione usque ad obitum Moysis, prout ipse asserit eodem contra Appionem libro, bis mille vero annos.

annos à Moyse usque ad everfam à Romanis Hierosolymam, idque colligi ex præfatione & postremo antiquitatum capite. Plana quidem ac facilis prima fronte videtur hæc conciliandi ratio, sed si quis penitus rem inspiciat, inveniet hoc pacto difficultates in immensum augeri. Quomodo-cumque enim disponantur & colligantur hi numeri, nunquam tamen inde justam & probabilem summam efficies, quæ vel cum Hebræis, vel Samaritanis codicibus, vel cum Græca translatione conveniat, aberit ab omnibus quam longissime. Sed neque Iosephus sibi constabit, nisi quis existimet, evertendum esse quidquid in eo est numerorum. Quandoquidem autem veritati non parum accessurum sit auctoritatis, si ostenderimus codices Hebræos seculo Iosephi necdum fuisse vitiatos, sed eadem continuisse temporum spatia, quæ Græca exhibet translatio; operæpretium fuerit in annos, quibus historiâ suam distinxit auctor gravissimus, diligentius inquirere, ac videre num ex singulorum partium intervallis mensuram universi temporis, an vero ex universi temporis cognitione de singulis partibus certi aliquid pronuntiare possimus.

Sic itaque sentio, Iosephum cum quinque milium historiam se collegisse scribit, non loqui de
spatio

spatio, quod ab initio creationis usque ad suam ætatem effluxit, sed de eo intervallo quod sacris continetur literis. Vide initium prioris libri contra Appionem, & præfationem operis antiquitatum, ubi clare docet continuam quinque millium historiam sacris comprehendi voluminibus. In subsequente tempore, illo nempe quod principium Alexandri Magni, & bellum postremum Judaicum intercessit, consuluisse quidem se gentis suæ monumenta, verum illa nec sacra, nec certæ fidei fuisse eodē contra Appionē scripto affirmat.

Habemus summā universam, nunc videamus an partes conveniant toto. De tēpore ante diluvium nullum relinqui dubium superius monuimus. Sed neq; in annis qui ab Abrahamo usq; ad Alexandri magni initium effluxerunt, ulla apud Iosephū difficultas occurrit. De illo tantum tēpore, quod Diluvium & Abrahami nativitatem intercessit, controversia moveri potest. Si quis singula loca examinet, inveniet spatio huic nonnunquā adsignari annos pauciores trecentis, aliquando 343. alibi 383. vel etiā 470. At vero si quis patriarcharum singulorum ætates subducatur, inveniet annos 983. Posteriores numerum nonnulli suspectum habuere auctoritate Ruffini, perperam tamen. Antiquissimus noster Ruffini codex plane eundem exhibet

bet calculum, quem Græca Iosephi exemplaria. Quamvis autem minime dubitandum sit, quin hæc annorum mensura ad veram proxime accedat, vitiosa est tamen, ac à Judæis in Græcia habitantibus, aut Græcis Judaïstis, truncata & variis adeo modis interpolata. Tharam non genuisse Abrahamum anno ætatis septuagesimo quinto, sed 130 ex ipso manifeste Iosepho colligi potest, cum dicit sepulto demum parente in Cananæam se contulisse Abrahamum. In anno natali Tharæ ab it & à Græcis & ab Hebræis : centesimo quippe & vicesimo patris anno genitum esse scribit. An errore librarium hoc factum sit, an vero in suis quos secutus est Hebræis codicibus ita scriptum invenerit, difficile fuerit divinare. Illud certum est, expunctum hic esse Cainanem, illum enim si addideris, habebis veram seriem & mensuram temporum, totaque chronologiæ ratio in Iosepho facilis, manifesta & sibi conveniens erit. Hoc quo clarius cognoscatur, ipsum ordinem quem in digerendis annis tenuit, subjiciam.

<i>Adam genuit Seth</i>	—	230
<i>Seth genuit Enos</i>	—	205
<i>Enos genuit Cainanem</i>	—	190
<i>Cainan genuit Maleleel</i>	—	170
<i>Maleleel genuit Iaredum</i>	—	165
<i>Iared genuit Enochum</i>	—	162
<i>Enoch genuit Mathusa-</i> <i>lem</i>	—	165
<i>Mathusalem genuit La-</i> <i>mechum</i>	—	187
<i>Lamechus genuit Noachū</i>	—	182
<i>Diluvium fit anno Noachi</i>	—	600

A principio itaque mundi usque ad diluvium
effluxere anni 2256.

<i>Ex Semo natus Arphaxat anno post Diluvium</i>	—	2
<i>Arphaxat genuit Cainan</i>	—	135
<i>Cainan genuit Sala</i>	—	130
<i>Sala genuit Eber</i>	—	130
<i>Eber genuit Phaleg</i>	—	134
<i>Phaleg genuit Ragau</i>	—	130
<i>Ragau genuit Serug</i>	—	130
<i>Serug genuit Nachor</i>	—	132
<i>Nachor genuit Thara</i>	—	120
<i>Thara genuit Abrahamum</i>	—	130
<i>Abraham venit in Cananæam annos natus</i>	—	75
<i>Hinc ad exitum Israelitarum ex Ægypto</i>	—	430
<i>Ab exitu vero ad obitum Moysis anni</i>	—	40

A diluvio ergo usque ad finem Moysis elapsi
sunt anni 1718, ab exordio vero mundi an-
ni 3974.

<i>A Moyſis obitu uſque ad templum Salomonis</i>	—	552
<i>Hinc ad everſionem templi à Nabuchodonoroſo</i>	—	470
<i>Hinc ad primum annum Cyri</i>	—	70
<i>A primo anno Cyri uſque ad Alexandrum anni plus minus</i>	—	200

A Moyſe igitur uſquè ad Alexandri magni initium colliguntur anni 1292, à mundi vero creatione uſque ad Alexandrum anni 5266.

Hucusque Sacrorum librorum hiftoriam extendit Iosephus, recte quoque illis quinque millium annorum traditiones contineri ſcribit. Ruffinus, qui multa in Iosepho corrupit, verba hæc in præfatione omiſit, quod Hebraico codici adverſari exiſtimaret. Vides quoque hic quatuor ferme annorum millia numerari à principio ad mortem Moyſis. Non recte itaque in ſcripto contra Ap-
pionem τετρακισχίλις in τριςχίλις mutarunt.

Absurdum vero maxime fuerit credere Iosephum, ſacerdotem & legum apud Judæos interpretem neglectis Hebræis codicibus, Græcam ſecutum eſſe verſionem. Quin potius ex hac computandi ratione ſequitur Codices Hebraicos olim cum Græca translatione conſpiſſe. Quantumvis igitur Judæi auctoritatem codicis ſui elevent, tum linguæ primigeniæ prærogativa, tum quod prophetarum manu ſit exaratus, ex ſupra-
dictis

dictis tamen satis, ut opinor, patet, septuaginta
 senum versionem, cum multis alijs in locis, tum
 præcipue in annorum supputatione, multo ad
 nos incorruptiorem pervenisse.

CAPUT IX.

*Idem ex annis Chaldæorum confirmatur, quorum
 initia explicantur.*

Dicamus nunc eruditæ gentium origines, ac
 videamus recte faciant qui Chaldæorum,
 Ægyptiorum ac Serum antiquitatibus ad ever-
 tendam Mosaicæ historiæ veritatem abutuntur.
 Incipiemus à Chaldæis. Horum enim maxime ja-
 ctatur vetustas, ut pote qui observationes Astro-
 nomicas quadringentorum & septuaginta mil-
 lium annorum habuisse dicuntur. Sanon dubi-
 to, quin Aristoteli ejusque sectatoribus tam e-
 normis annorum series occasionem præbuerit, ut
 mundum æternum, vel ut ipsi loquuntur, ingeni-
 tum esse senserint, cum plerique, qui illos præcef-
 sere Philosophi, præter unum Ocellum Lucanum,
 mundo principium dederint. Sed falso Græcu-
 los tantam Chaldæis vetustatem attribuisse, vel
 unus ille docere possit Callisthenis locus, quem ad

secundum Aristotelis de cœlo librum ex Porphyrio affert Simplicius. Rogarat Callisthenem Aristoteles, ut in antiquitates Chaldæorum inquireret certiolemque se faceret. Respondit ille, nullas se apud Babylonios reperire potuisse observationes antiquiores annis mille nongentis & tribus, usque ad captam ab Alexandro urbem. Incidit hoc tempus in annum post diluvium sexagesimum primum juxta vulgarem supputationem. Sed sane nulli tum Chaldæi, nullus rex, non Babylon ipsa, nulla denique cura observationum astronomicarum. Si vero veterem LXX. interpretum sequamur rationem, omnis prorsus tollitur difficultas. Annus enim 1903 ante Babylonem captam sex annis prævertit nativitatem Abrahami, quando nēpe mille jam ferme anni à diluvio erāt elapsi. Multo tamen altius arcessenda sunt Chaldæorum initia; diu siquidem apud eos regnatum fuit, priusquam astrorum vigeret scientia, nec Ninus & Semiramis primi regnum in Babylone tenere, sed ante illos septem Chaldaici reges, ac præterea sex Arabes per annos quadringentos & quadraginta imperarunt. Singulorum nomina & imperij tempora ex Africano subjiciam, quia vulgo non recte concipiuntur.

Primi

Primi Chaldæorum in Babylonia reges.

I. Euechous, qui perperam Nimrod esse creditur, annis	— 6 —	Mensibus 8
II. Chomasbolus regnavit annis	— 7 —	Mensibus 6
III. Porus annis	— 35 —	
IV. Nechubes annis	— 43 —	
V. Abius annis	— 48 —	
VI. Oniballus annis	— 40 —	
VII. Chinzirus annis	— 45 —	

Regnarunt hi per annos 225. menses duos. Post hos regnum Babyloniæ obtinuerunt Arabes, isti nempe.

I. Mardocentes regnavit annis	— 45 —
II.	— 40 —
III. Sisimordacus	— 28 —
IV. Nadias	— 37 —
V. Parannus	— 40 —
VI. Nabonnadus	— 25 —

Horum imperium stetit annis 215 usque ad Belum Assyriorum regem, qui expulsis Arabibus Babylonium imperium obtinuit per annos quinquaginta quinque, cujus post mortem demum successit Ninus. A primo itaque Chaldæorum rege Euechoo usque ad Ninum colliguntur anni 495. Quod si initium Nini referamus ad annum sextum priusquam Abrahamus nasceretur, uti monuimus, jam initium regni Assyriorum referendum erit ad annum

annum mundi 2887, anno post diluvium 631, uno præcise seculo post dispersionem gentium, ac turris Babylonicæ ædificationem, quæ facta est cum Phaleg nasceretur, ut clare indicat scriptura. Vide quam ipse semetipsum explicet historię ordo, nec opus sit confugere ad prophetias, ac nescio quas ineptias, quibus dum alij vasta implent volumina, non tantum lectori fastidium, sed & sibi & literis attulere contemptum, improbis vero de Sacrorum librorum veritate præcipuam dubitandi dedere occasionem. Unde autem conflatae sunt immensæ illæ annorum myriades, quas antiqui auctores memorant, & hujus quoque rei causam breviter expediamus. Sciendum itaque Chaldæis veteribus non tantum cognitissimam fuisse diluvij historiam, uti docent celebria illa Berosi & Abydeni fragmenta, verum etiam eos majorem quam aliæ gentes habuisse notitiam eorum quæ ante diluvium contigissent. Nec sane fieri aliter potuit, cum non tantum familiares fuerint primis patriarchis, sed etiam cognatione junctissimi. Ex illis itaque, vel etiam aliunde, cum non nihil intellexissent de longævitate eorum qui ante diluvium vixissent, nec tamen exacte vitæ spatium nossent, factum est ut longe diuturniorem illis vitam tribuerint, atque sacra doceant literæ. Decem enim

enim reges ab Aloro primo usque ad Xisuthrum,
 (qui est Noachus, vel potius Semus) regnasse aje-
 bant Saris centum & viginti. Sarum vero confi-
 ciunt anni 3600. Sari itaque 120. constituunt an-
 nos 432000. Panodorus & Annianus, ut est apud
 Georgium Syncellum, vastum hunc annorum nu-
 merum in dies resolvebant, unicuique Saro tri-
 buentes decennium. Centum itaq; Sari efficient
 annos 1200. Secundū hanc rationem per 1200 an-
 nos ante diluvium regnatum fuit apud Chaldæos,
 reliquum vero tempus fuit ἀβασιλεύοντων. Hæc ratio
 quamvis nonnullis probabilis videatur, mihi ta-
 men displicet. Fabulosa non sunt ad veritatis nor-
 mam nimis rigide examinanda. Ego sic existimo,
 Chaldæos satis accuratam cognitionem habuisse
 eorum quæ post dispersionem gentium contige-
 re, illinc namque, ut ostendimus, annales eorum
 incipiunt: diluvij quoque haud levem habuisse
 notitiam satis ex Berofo & alijs est manifestum,
 cum non tantum Noæ meminerint, quem Oan-
 nem vocant, sed & conjugis, & liberorum, & co-
 lumbæ, & navigij quo salvi enatarunt, claram fe-
 cerint mentionem; sed vero de iis quæ ante dilu-
 vium evenere, unum tantum illud cognovisse vi-
 dentur, totidem fuisse ætates, quot à Moy-
 se memorantur. Uti enim Noë decimus est ab
) ū (Adamo,

Adamo, ita quoque Xisuthrus, quo regnante supervenisse diluvium scribunt, decimus fuit ab Aloro.

CAPUT X.

Antiquissima Ægyptiorum tempora eruuntur, ac horum quoque testimonio præcedens calculus confirmatur.

VENIAMUS ad Ægyptios, & ipsos magnæ antiquitatis ostentatores. Siquis annorum, quos memorant ineat numerum, aliquanto quidem modestiores Chaldeis fuisse videntur, at vero siquis immensum regum spectet catalogum, perpetua, ut ajunt, serie sibi invicem succedentium, longe altius origines suas asseruere. Chaldei enim, teste Beroso, ab exordio rerum usque ad Abrahamum viginti tantum ætates numerant, decem nempe ante, decem item post diluvium. At vero apud Manethonem ante Abrahamum aliquot regum recensentur centuriæ. Et tamen longe recentiores sunt res Ægyptiorum, utpote apud quos ne diluvij quidem ulla exstiterit memoria. Demum à rege Mene petenda sunt eorum initia, hic primus fuit hominum qui in Ægypto

to regnarunt. Annosam illam deorum semo-
 numque seriem adjecit gens vanissima, ne Chal-
 dæis generis antiquitate cedere viderentur: ac
 quia mortalia jam dudum deficiebāt nomina de-
 ducenda fuere in terram sidera & planete, ipsum-
 que exhauriendum fuit cœlum, ne deessent pul-
 chra vocabula, quibus Ægyptiacorum regum ca-
 talogus instrueretur. Sed quandoquidem & lo-
 cus postulat, & quamplures viri eruditi in dige-
 rendis Ægyptiorum annis frustra laborarunt, re-
 cte ut opinor faciemus, si aliquanto diutius hic
 immoremur, tum ut illorum litem finiamus, tum
 quoque ut nostrum comprobemus calculum. A
 Mene itaque incipiendum, nam pleraque quę il-
 lum præcessere tempora, vel omnino fabulosa
 sunt, vel tot involuta figmentis, ut vix ullo inge-
 nio humano aliquid veri ex iis possis exsculpere.
 Non Græci tantum hunc primo recensent, sed &
 ipsi Ægyptij ab hoc regum suorum seriem auspi-
 cantur. De ætate vero, qua vixit, incredibile est
 quantum à Manethone Ægyptio abeant Era-
 tosthene & Diodorus Siculus, Græci quidem hi,
 sed tamen & ipsi secuti Ægyptios. Horum sen-
 tentiam postea referam, ac veritati consentaneam
 esse ostendam, ubi modum ac rationem quam in
 adstruenda Ægyptiorum vetustate tenuit Mane-
 tho

tho prius exposuero. Is itaque à Mene primo Ægyptiorum rege usque ad Psammetichum quinque annorum millia & aliquanto amplius numerat. Floruit Psammetichus Manassis & Josie regum temporibus. Diximus vero superius veteris instrumenti libros continere historiam quinque mille annorum, ac trium ferme seculorum. An forsan voluit Manethon ad normam Judaicarum antiquitatum, Ægyptiaca quoque conformare tempora? Potuit sane videre LXX interpretum translationem, utpote quæ ejus ætate facta sit, & proculdubio vidit. Aufer enim à prædicta summa id quod à Psammeticho usque ad initium Alexandri intercessit spatium, & supererit præcise summa annorum quinque millium. Hucusque historiam suam perduxit Manethos.

Verum non hic substitit flaminis Heliopolitani impostura. Non contentus Menem primum Ægypti regem Adamo æqualem fecisse, altero quoque usus est commento, quo figmentis suis auctoritatem conciliaret. Scribit se antiquitates istas Ægyptiacas hausisse è columnis vel potius lapidibus qui sint in terra Seriadica, exstructis à primo Mercurio, dicto Ægyptis Thoyth, quarum scripturam Hieroglyphicam post diluvium interpretatus sit Agathodæmon. Quærun viri eruditi que-

quænam sit illa terra Seriadica. Minime profecto quærenda est hæc in Ægypto. Manifeste ejus situm explicat liber Judicum cap. 111. v. 26. ubi dicitur Ahod occiso Moabitarum rege evasisse ad montem Ephraim, ac transisse sculpturas quæ erant in Seirata. Pro sculpturis vulgo reposuerunt lapidinas, recedentes à vera vocis Hebraicæ significatione. Recte LXX interpretes reddidere τὰ γλυπτὰ. Illic nempe erat cippus ille lapideus, quem Judæi credebant à Setho Adami filio esse collocatum, uti docet Iosephus, qui lapidem istum suo etiamnum ævo existisse scribit in loco dicto Syriada. Sed apud Eusthathium in Hexaameron, qui ex Iosepho eandem narrat historiam, loci hujus nomen rectius concipitur, appellatur siquidem ab eo ἡ Σηθιαία, ut planum sit eandem signari terram, quæ in libro Judicum describitur ad montem Ephraim haud procul Jericunte. Jam vero concedamus cippos aut columnas istas à Setho fuisse erectas (quod tamen minime credibile) qui tam stulte sapiat, ut existimet Agathodæmonem ex illis hausisse catalogum regum Ægyptiacorum, tum qui ante Sethum, adeoque ipsam creationem mundi, tum quoque illorum, qui aliquot annorum millibus Setho fuere posteriores?

De proposito ac fallaci Manethonis fundamen-

to hæc breviter dicta sufficient, nunc modum, quem indigerendis Ægyptiorum regibus tenuit, exponemus. Ex eo quoque cognoscemus quam mala fide gentis suæ vetustatem in immensum pene extenderit. Cum diversi reguli & Sacerdotes in diversis Ægypti nomis seu præfecturis simul regnarint, ille singulorum spatia separavit, ac sic longam contexuit seriem, annos implicitos in folios permutans. Jam inde ab excessu Menæ regis varias præfecturas seu dynastias ortas fuisse in Ægypto, ex eo præcipue colligi potest, quod cum antiquissimæ dynastiæ, suos quæque numerent regulos, ad unum tamen Menem pleræque initia sua referant. Thinitarum primus Manethoni est Menes. Eratostheni & Apollodoro Diospolitano, rum primus sic nominatur. Alia est regum series, licet ea interrupta sit, quam Herodotus & Diodorus Siculus recensent, tamen & hæc quoque à Menæ exordium capit. Plurimum vero errant, qui Menem istum Thinitem ab altero Menæ Thebite Thebano, Diospolitarum primo rege distinguunt: nempe ut Manethonis Menem vetustiorrem faciant, illo Eratosthenis. Sed vero miror eruditos viros tam leve mendum non animadvertisse, utrobique enim Thinites reponi debet. This oppidum prope Abydum Ægyptiacam erat situm

tum teste Stephano Grammatico. Hinc fuit Menes Thinites, hinc quoque Nomus Thinites dictus. Recte quoque idem Menes Thebanus dicitur, Thinite quippe erant Thebani. Sed & in nomine Athothis filij qui Meni successit, conveniunt Manethos & Eratosthenes, unde planum fit & certum, unum tantum Menem fuisse, ad quem referenda sunt pleraque Ægyptiorum primordia.

Clare satis ex iis quæ diximus colligi potest, plerosque istos regulos, qui à Manethone memorantur, non simplici ordine sibi invicem successisse, sed plures simul in diversis nominis eodem tempore regnum obtinuisse, nec reges proprie, sed nomarchas esse dicendos. Unus vero ut præesset rex Ægyptiis, id nunquam factum videtur, nisi vel occupatis ab hostibus, aut ab aliquo nomarcharum tyrannide oppressis.

Numerum Nomarcharum quod attinet, illum duodenum fuisse existimo. Colligi hoc potest ex ipso quoque Manethone. Si enim divulsas dynastias componas, ac auferas Persarum, Æthiopum, & insuper Pastorum Phœnicum imperia, Nomini supererunt duodecim, hi nempe; Thinitarum, Memphitarum, Elephantinorum, Heracleopolitarum, Diospolitarum Thebanorum, Diospolitarum

tarum minorum, Xoitarum, Tanitarum, Bubastitarum, Saitarum, Mendefiorum, & Sebennytarum. Plures quidem erant in Ægypto Nomi, sed nec antiquitate, nec dignitate cum supramemoratis comparandi, utpote qui locum in dodecarchia Ægypti nullum habuere. Ultimi Nomarcharum fuere illi, qui una cum Psammeticho regnarunt. Verum hunc, pulsus aliis undecim, regnum sibi soli adseruisse, notum ex Herodoto & Diodoro Siculo.

Hæc de Nomis & Nomarchis Ægyptiorum, quia ad præsens institutum faciebant, necessario fuere præmittenda, idque eo magis, quod multi frustra in hoc argumento laborarunt. Scaliger, ut negotium conficeret, duplicem excogitavit periodum Julianam, quæ annis mille & sexcentis fere mundi natalem anticipat. Verum nec mentem Manethonis adsecutus est, à veritate verorecessit quam longissime. Manifestum hoc fiet, si neglectis commentitiis Flaminis Heliopolitani annis, vera Ægyptiaci regni initia explicaverimus. Hæc ut habeamus, primum Eratosthenem ducem sequemur.

Is igitur genere Cyrenæus, & ferme æqualis Manethoni, utpote qui natus sit eo circiter tempore, quo alter tomos suos compilavit, seriem regum

in Ægypto regnarint, fuisse quinquaginta duos: illis Busiridem ejusque progeniem successisse. A Mene autem rege usque ad Busiridem effluxisse annos plusquam mille & quadraginta, prout habent castigatiora Diodori exemplaria. Busiridis ætas ex Isocrate colligitur, cum scribit, Perseo Jovis & Danaes filio quatuor ætatibus Herculem esse juniorem: Busiridem vero plus quam ducentis annis seniore. Tribus vero seculis Hercules Thebanus Josua est recentior. Si itaque ponamus Busiridem centum annis post Josuam vixisse, quod verum esse ex ipsa Herculis genealogia evincitur, jam conspirabunt ad unguem Diodorus & Eratosthenes. Quod si Eusebium sequamur, qui Busiridem collocat ad annum secundum post obitum Josuæ, non quidem refragabor, interim nullus dubito quin verior Isocratis sit mensura; nam certe error est Eusebij, nequid gravius dicam, quod ut cæterorum Ægypti regum, ita quoque Busiridis annos loco moverit, nimiam omnibus antiquitatem adfingens.

Sed & ex ipso Manethone veritas quodammodo haberi potest. Si quis enim confusas dynastias à se invicem separet, ac unamquamque seorsim consideret; puta si quis dynastias omnes Memphitarum componat, ac quartam tertiæ, sextam quar-

tæ, ac sic deinceps septimam & octavam proxime faciat succedere, non multum à vero aberrabit. Idem quoque continget in Diospolitarum minorum divulsis à se invicem dynastiis, quales sunt XI. XII. XIII. XVIII. XIX. XX. Diospolitarum majorum, sive Thebanorum regum semel tantum fit mentio in fragmentis Manethonis, nempe in dynastia XVII. Sed hunc defectum supplet catalogus Eratosthenis, quæ nobis conservavit Africanus, quiq; eum secuti sunt Eusebius & Syncellus. Duo tamen hic præcipue notanda, quorum prius hoc est; Manethonem omnium sequentium dynastiarum capita præcidisse, ne unum idemque principium habuisse viderentur, cum tamen à Mene & Athothe pleræque incœperint. Alterum est, in his dynastiis compingendis, nequaquam esse sequendum ordinem & calculum Scaligeri. Multum enim à vero recessit, cum Menem Thebanum à Mene Thinita distinguit, ac Thebanorum regum initium collocat ad annum decimum quintædecimæ pastorum Phœnicum dynastiæ. Non parum quoque erravit, quod Mosis nativitatem constituerit ad annum XXV Mispthagmuthosis, qui fuit sextus rex in decima octava dynastia, cum jam diu antequam decima octava dynastia inciperet, Moses vixerit. Sub primo enim hujus dynastiæ rege Israe-

) à à 2 (litæ

litæ Ægyptum reliquere, ut ipsa apud Iosephum testantur Manethonis verba. Sed confudit Scaliger Alisfragmuthosin cum Misfragmuthosi, & primum dynastiæ decimæ octavæ regem cum septimo. Alia ejus errata hic annotare instituti nostri brevitās non patitur; sufficit ostendisse quomodocumque colligantur anni Ægyptiaci, dummodo commentitium Manethonis calculum excipias, semper primordia regni eorum incidere in tempora Phalegi, uno plus minus seculo post dispersionem gentium. Nec quisquam, ut opinor, de firmitate argumentorum nostrorum dubitabit, nisi qui aut hæc non intelligat, aut veritatem ode-rit.

CAPUT XI.

*Serum origines explicantur, è quibus idem
certo evincitur.*

VEniamus nunc ad illos, qui non tam suo, quam vicinorū Sinensium nomine, vulgo censentur. Seras dico; genus hominum omnium quodquot unquam fuere longe literatissimum. Continuatim quater mille & quingentorum annorum historiam monumentis & annalibus suis conditam ser-
yant. Scriptores habent ipso etiam Moyse anti-
quo.

quiores. Jam inde à principio nullis finitimorum commerciis temerati, non bella novere, non jurgia, orio tantum & voluptatibus & naturæ contemplationi dediti, transegere spatium plusquam quater mille annorum, ignoti quidem aliis mortalibus, cæterum ipsi suæ sibi conscij felicitatis. Ante quatuor demum secula incursione Tatarorum, exteris quoque id regnum patuit, ac præcipue Marco Paulo Veneto & Oderico cuidam. Reduces illi ad suos retulere non miranda tantum, sed & stupenda prorsus. Verum historiæ illorum, licet sint veræ, pro meris tamen fabellis habitæ fuerunt, etiâ à viris cordatis, & adeo quidē, ut Ludovicus Vives mirari se scribat bonas horas à quibusdam in talibus collocari nugis. Nec tamen illo seculo, qui veritatem adfereret, repertus est quisquam. Rari illuc se contulere, rariores qui in id regnum penetrare potuerint, qui vero pedem inde retulerit, nemo. Credo non remeasse, pellectos gentis indole & cœli solique clementia ac benignitate, difficile est enim Sericas degustasse delicias, & non penitus oblivisci patriæ & amicorum. Chorographiæ Sericæ interpret, vir minime ineptus, qui multo moderatius de gentis hujus virtutibus scripsit, quam sensit, rediturus ad Seras nec ipse diffitebatur amicis suis, natale etiam so-

lum exilium sibi videri, & moriturum se cito, nisi moriatur in Seribus. Non est itaque mirandum, ex paucis, qui olim eo profecti sunt, præter memoratos duos, nullum omnino esse reversum; cum hodie è multis qui eo sese conferant, pauci admodum redeant, pauciores etiamnum futuri, nisi barbarorum quos dixi immanitas, sublati maxima ex parte oculorum animique incantamentis, regnum omnium quotquot Sol adspexit beatissimum, in carnificinam & Cyclopum speluncam convertissent. Hoc demum ævo Serum calamitas, Serum nobis dedit notitiam. Quamdiu ignoti cæteris vixere mortalibus, tamdiu fuere felices. Postquam ad miserrimam redacti sunt servitutem, barbaris quibus parent permittentibus, patet ad illos aditus. Miranda artis & nature opera quæ ex hujus regni cognitione ad nos perlata sunt, non est hujus loci recensere. Ea saltem referemus quæ de annis & antiquitate gentis comperimus.

Serum itaque tempus historicum incipit annis ante natum Christum 2847. septem tum simul reges habuere, quorum posteritas per annos sexcentos quadraginta duravit. Exin regnum Serum devolutum est ad familiam Hiaa per annos 441. Huic successit Xanga familia, quæ regnavit annis 1144. Dein Cheva familia annis 376, mox Cina fami-

familia annis 40, inde Hana familia annis 460, denique Cyna familia annis 155, regnum tenuere. Postea quinque reges simul imperarunt donec unus totam ditionem invaderet, à quo Tanga familia instituta. Hi juncti regnarunt annis 209. Dein penes quosdam Heutay dictos imperium fuit per annos 305. His successit Sunga familia, quæ cum per annos 355. imperasset, à Tataris penitus extincta fuit. Exinde Serum imperium pene Tataros maxima ex parte fuit, quorum familia dicta Ivena imperium tenuit annis 90. Tataris vero expulsi à Taimingis, quorum familia regnavit 276 annis, ac nunc demum tota, ut audio, deficit, extincta à Tataris, qui universo jam potiuntur regno. Hi familiam suam Taicingam nominarunt annis ab hinc 14.

A principio itaque regni Serum, usque ad finem præsentis anni, qui est 1658 post Christum natum, colliguntur in universum anni 4505. Si Hebraicum sequamur, jam numerus hic aliquot seculis anticipabit diluvium, sed vero si nostram quis amplectatur computandi rationem, exactissime hic habebimus tempus dispersionis gentium, quam factam esse diximus ante & post nativitatem Phalegi, annis post diluvium 531.

Antiquiorum temporum, quæ præcessere &
mox

XLVIII DISSERTATIO

mox subsecuta sunt diluvium universale, memineret quidem Seres in suis annalibus, ipsi tamen nihil certi de iis adfirmare audent, libenterque hic suam agnoscunt ignorantiam. At vero in temporis historici mensura, illa nempe quam diximus, mirum quam omnes ipsorum scriptores conveniant. Quis itaque neget ex hujus quoque gentis certissima Chronologia invictum posse peti argumentum, quo & illa, quam instituimus, supputandi ratio, & simul Sacrarum literarum veritas stabiliatur?

CAPUT XII.

Aliarum gentium opiniones. Examinantur præcipua auctoris de Præadamitis argumenta. Locus Pauli Apostoli explicatur. Diluvio totum quidem humanum genus periisse, non tamen eo universum terrarum orbem obrutum fuisse ostenditur. Epilogus.

NON desunt aliarum quoque gentium testimonia, unde hæc productior mundi ætas demonstrari possit. Si enim suffragiorum numero certandum sit, erunt nobiscum Siamenses sive Sineses, Persæ, Arabes, Æthiopes alique, qui omnes à principio creationis, usque ad præsens tempus septem plus minus annorum millia numerant; sed quan-

tus, quam omnibus adversariorum argumentis? Libri huius auctor licet toties confutatus, licet multis ac magnis propositis pœnis & præmiis mutatus jamdudum sententiam suam deseruerit, superest nihilominus ejus opinio in illa quam reliquit secta, quam avidè amplectuntur, quotquot libenter à sacris dissentiant literis. Quamvis autem varia videantur Præadamitæ argumenta, qui tamen vel modice sapit, facile animadvertet, falsam istam de gentium antiquitate opinionem, præcipuam, &, nisi fallor, unicam scribendi causam fuisse. Nam quod locum Apostoli adinet, unde opinionem suam adstruere conatur, minime verisimile exinde ita sentiendi occasionem hausisse. Infelices sunt qui in Sacris literis ea se reperire posse confidunt, quibus Sacrarum literarum fides possit destrui. Minime puto id eum in animo habuisse, quin potius existimo, diligentissime divinos codices pervolvisse, præteriisse vero loca sententiæ suæ inimica, ac ea tantum annotasse, unde aliquid opinioni suæ consentaneum excludere se posse speraret. Quamvis autem neminem inveniri putem, qui istam ejus expositionem probet, cum lex semper pro lege Mosis, nunquam vero pro particulari aliquo præcepto accipiatur, merito tamen & ille aliorum om-

guit

guit tamen poena transgressionis Adami, non tantum in peccatoribus, verum etiam in illis, qui non peccarant. Concludit itaque tempus regni mortis durasse ab Adamo, usque ad Moysen, hoc est legē Moysis, quando nempe Christus nos sanguine suo redemit. Moysen enim accipi hic pro lege, ac pro toto illo spatio quo vixit lex, recte jam alij observarunt.

Satis quoque ex iis quæ diximus colligi potest, minime verum esse, id quod idem ille mundanæ antiquitatis adsertor conatur adstruere, diluvium non fuisse universale, sed diversis temporibus & locis diversa quoque fuisse diluvia. Secundum enim nostrum calculum diluvium Serum exacte cum Noachico convenit. Conveniunt quoque Chaldæi, & Berosus, cum Abrahamum decima ætate post diluvium natum esse scribit. Ægyptiorum historiā eo non pertingere superius ostendimus. Idem de Græcis sentiendum, qui licet aliquid de universali hac aquarum clade intellexissent, in definiendo tamen annorum numero multum à se invicem abeunt, ac plus etiamnum à veritate. Quemadmodum enim multæ aliæ gentes, sic quoque Græci vetustissima tempora, non per annos, sed per ætates distinxere; quia vero nescivere primos post diluvium homines admodum fuisse longævos,

gævos, ac seculo & amplius peracto demum genuisse, mirum in modum contraxere temporum spatia, unicuique ætati viginti quinque aut triginta tantum annos attribuendo.

Nullum itaque relinquitur dubium, quin unum tantum fuerit diluvium, idque universale, cujus apud omnes pene gentes exstat memoria. Verum hic minime eorum probo sententiam, qui totum terræ globum ita aquis tectum fuisse existimant, ut nulla prorsus ejus exstaret portio. Ad hoc efficiendum multa debuissent concurrere miracula. Cum enim universæ orbis aquæ non sufficiant, ad obruendam tam alte terram, etiamsi omnia maria siccentur, debuissent vel plures aquæ creari, vel dicendum cum aliquibus, istam aquarum molē ex aliis cæli orbibus decidisse, ac denuo finito diluvio ad sedes suas revolasse. Verum hoc est pie nugari. Deus non facit miracula frustra. Quid opus erat illas mergere terras, ubi nec olim fuere homines, ac ne nunc quidem sunt? Stultum est putare ante diluvium adeo multiplicatum fuisse genus humanum, ut omnes terræ angulos pervaserit. Quam tarda & segnis tunc fuerit humana natura in producendis hominibus ex eo nobis constat, quod Noachus nonus demum fuerit ab Adamo. Quisquis itaque recte calculum

) ē ē 3 (

inie-


inierit, inveniet ab octo illis, qui diluvij cladem evasere, usque ad tempus dispersionis gentium, longe plures potuisse nasci mortales, quam ab uno Adamo spatio bis mille annorum. Atqui tamen certum est, ante dissipationem Babylonicam humanum genus modicam tantum Asiæ portionem tenuisse. Longe itaque absunt à veritate, qui existimant Noachi ætate per universum orbem propagatos fuisse homines, qui ne Syriæ quidem & Mesopotamiæ fines forsan excefferant. Ut vero diluvij inundationem ultra orbis habitati terminos producamus, nulla jubet ratio, imo prorsus absurdum, dicere ubi nullæ hominum sedes, illic etiam viguisse effectus pœnæ solis hominibus inflictæ. Licet itaque credamus illam tantum terrarum portionem, quam significavimus, quæque ne centesimam quidem partem orbis universi constituit, solam aquis fuisse obrutam, erit nihilominus diluvium universale, erit œcumenicum, quandoquidem clades fuit universalis, & totum orbem habitatum oppressit. Sic si statuerimus, jam cessabunt ineptæ istæ & futes quæstiones, quas nonnulli de diluvio moverunt, & simul improbis de Sacrarum literarum veritate dubitandi omnis præripietur occasio.

Verum hæc de Præadamitis obiter dicta sufficiant.

ciant. Ut vero ad nostrum revertamur institutum, unum hoc antequam desinam adjiciam, nos non hic novam condere Chronologiam, sed veterem temere abrogatam reducere. Quod si qui iis quæ adtulimus argumentis & testimoniis non acquiescant, amplectantur illi hodiernum Judæorum calculum absque ratione, ac utantur ingenio suo prout libuerit. Sciant tamen quod sic sentiendo non veritati tantum fucus fiat, sed & latissima improbis porta aperiatur ad impugnandam Sacrarum literarum fidem, ac vel apud æquos judices de bonis & piis triumphandi. Ut itaque veritati satisfiat, ac impiis os obtundatur, addantur ad receptam mundi ætatem anni 1440. jam nulla supererit difficultas. Præsens itaque æræ mundanæ annus is est 7048.

INDEX CAPITUM.

- CAP. I. **M** Undum nec æternum esse, nec vetustiore[m] quam
Moyses statuerit. I
- CAP. II. Moysis sententiam de tempore creationis, ex Græca potius translatione, quam ex Hebraico codice esse hauriendam. IV
- CAP. III. Examinatur ratio temporis quod secundum codicem Hebræum effluxit à Principio creationis, usque ad Diluvium. VIII
- CAP. IV. Proponitur & confirmatur Græcus LXX. interpretum calculus de spatio quod Diluvium præcessit. XI
- CAP. V. Proponitur & rejicitur numerus annorum, qui ex Hebraicis codicibus colligitur, à diluvio usque ad Abrahæ nativitatem. XIV
- CAP. VI. Proponitur & confirmatur LXX Interpretum de eodem spatio calculus. XIX
- CAP. VII. Ex Samaritico codice idem adstruitur. XXII
- CAP. VIII. Idem probatur ex Flavio Iosepho, cujus tota temporum ratio ostenditur. XXIII
- CAP. IX. Idem ex annis Chaldæorum confirmatur, quorum initia explicantur. XXIX
- CAP. X. Antiquissima Egyptiorum tempora eruuntur, ac horum quoque testimonio præcedens calculus confirmatur. XXXIV
- CAP. XI. Serum origines explicantur, è quibus idem certo evincitur. XLIV
- CAP. XII. Aliarum gentium opiniones. Examinantur præcipua auctoris de Præadamitis argumenta. Locus Pauli Apostoli explicatur. Diluvio totum quidem humanum genus periisse, non tamen eo universum terrarum orbem obrutum fuisse ostenditur. Epilogus. XLVIII



F659
v971d

2
CO

11

